

1 PETER

Peter-hu God-are aribövi jejëmade jöhoje.

¹ Iesu Keriso-are apostle Peter naro jemesi örire jejëmije. God-hu hesinö baejövade aribövioho jemë jemesi sa'aho vuonugo'i Pontus Galatia Capadocia Asia Bithynia ë sa'are ma-jahuri raromobe va'aruje aribövie jëve.

² God Vavuohuro hesi nimë'ëro jemë baejëvamu hesi Aru'ahohuro jemë avohëvadeje ëhuro jemëro hesi aribövi maemu jioromo Iesu Keriso-are jöho ejaho'irarijego o hesi köhuro jemë u'ovëvo'iröhego.

Na nege God-ro huë baejëvoromo ajëmi avohego maro raromonövo'irarijego.

Mae javuoröhego noehu biririvoromo muebejarue jöhoje.

³ Asë'e God hu mabëheje. Hu nosi Bada Iesu Keriso-are Börömeje o göho hesi Vavueje. Ëaho God Vavuoho hu mabëheje. Ëhesi bëhoho huro nosi jöëni börömo mae vavaenimë'ëro Iesu Keriso ajamamu guomoromo ri'öjadohuro ëhuro no'o ajamuamu i'ovoromo mu i'oho baejë'ëro nune jioromo biririvoromo muebejarueje mae javuoröhego.

⁴ Noro muebejarueje Vavuehu hesi aribövi no bojamui'iröhe suvuoro mae gö gö baeröhëni. Ësuvuoroho ö'idöre jemëni nugëhë'eje u'emu

bae'irarijego. Ĕö'idöre jiaje suvuoro ho bogo sagohori'i bogo sisërë'i ma-maemu jiobe va'ë'e.

⁵ Iae jemëhu God ma uehorovarujohuro ëhuro God-ro hesi darugohuro burunö'e aegëhobe va'ajeje ijo tugoho'i majaho rovego evare maro bamëvo'iröhe öroho mami'e avohëhë'ëro evare röjëhijego ga'irarijego.

⁶ Huhu maro bamëvo'iröhe öroho uehorovoromo nimoroho avoharujeje. Iae jaruvoho God-hu nimë'oho jemëro huë vavaene bövie bise'e baeromo ëhuro majae ma-bunemu vavaenimë'e raromarujeje. Ĕhi jie röhu iae nimoroharujeje.

⁷ Huë vavaeni baejaruje hesi bëhoho jemë'o no'o ga'iröhëni jemesi uhohu'o biririvoromo God mae uehorovego. Ĕhesi jöho na uhu'e uë'ië'e. Gold mae avoho'ië'iroho vëniro buejarueje. Vëniro buejego ravoromo va'inumoho si'urë barë'i ma-aji mae jiajeje. Röhu gold-ho bogo ioro'io remu jio'irögoro jemëhu God mae uehorovaruje muoho ma-jiemu jiobe va'ë'e. Ĕhi jië'ëro God uehorovaruje muohuro gold-ho iosiramiro mo ma-mabëheje. Röhu vënehu gold buejego ravajëhi huë vavaenohuro jemesi örire ëhi vëninö'e ravëvajeje. Röhu gold vëniro buejego ravoromo sisë si'urë barë'i aho'o ma-maemu jiego gavaruëhi jemë ëhi huë vavaenoho baejarujeje ëhuro jemëhu God uehorovarujoho biririvego jemë'o no'o garomo uvoröhëni: Jemë huë vavaene baeromo biririvoromo God mae uehorovobe rovë'ëro ëhu'ëro jemesi uhohu'o God maemu uehorovaruje höjo. Ĕhi uvego Iesu Kerisoro a nuniro rovego evare God-ro jemesi

ihoho dōro bamēhoromo rajēhiromo mabēhe uērōhego. Ēhu'ēro jemē huē vavaenoho baejarujeje.

⁸ Amo Iesu Keriso rue'iramu jemesi ihoho ēhi ma-maemu jiēho'ē'e. Avevejō'o ho jemē hu bogo gavē'e jemesi dē vōvōbajo'o uhure hesi ōrire uehorovarujeje. Jemē hu bogo nunoho gavarujeje rōhu hu mae uehorovoromo nimoroho avoharujeje. Nimoroharuje jōho bōrōmo bēhe jiē'ego ē hesi jōho bogo ato varijēnoho jēve.

⁹ Jemēro uehorovoromo uvarujeje: Noehu Keriso mae uehorovarue hesi bēhoho ijonō God-ro nosi dē vōvōbajo'o ho maro bamahuo'iramu iae mae javuo'ajē uvoromo huē mabēhe jēvego nimoroharujeje.

¹⁰ Urimo Keriso bogo rovadevare evare God-hu jemē mare bamēvorōhe jōho jō hesirire baeromo majēhinōvare a mamiohuro majēhinōvareje. Majēhiromo rōhu ē jō hesi bēhoho avo'avoho nahareje ga'i ē muoho diehi jiego.

¹¹ Kerisohu vi'ehi baeromo guomoromo ijonō aji bae'irōhe jōho Keriso-are Aru'ahohuro jabumē rōjēhijamu simanore baeromo bēhoho nahoromo uvoruomadeje: Ēhi jiē'e muoho divare diehi jio'a'ajējo.

¹² Bēhoho nahamu God-ro rōjēhijamu garomo uvareje: Noehu jajivarue mu mabēhoho jaruvo ave sa'are raromaruoho no bogo ga'i ijonō raromoruomorōhe aribōviohuro garuomo'ajējo. Ējōho God-ro rōjēhijamu baejareje. Rōhu avevejō'o ho ē muoho jemē iae hejē'e jēve. God-hu ō'idōre jiamu noni nugō'ōjade Aru'aho hesi

uehoroho baeromo aëro ë mu ma hesi jöho huruoho majëhijamu hejarijeje. Ëmu ma hesi bëhoho aneraho jabu'o he'i nimoruome röhu bogo eni jëve.

Noehu mu sisë bogo gavanovo'i mu maemu vaeröhego God-hu uövuade jöhoje.

¹³ Ëhuni nune jioromo mue vae'i avo'avoho uehorovore. Iesu Keriso a nüniro rue'iramu God-are aji maho bae'a'aruje. Ëjöhuremu avo'avoho uehorovë'e raromore.

¹⁴ Ëhi uehorovë'e raromoromo God-are jöhuremu ejahonövore. Mami'e God-are jö bogo hejarije majare jemesi sinehu nimajohemu vaejarijoho ëhi jië'e mu öriroho nadi jijihore.

¹⁵ Nadi ëhioho jijihö'i a'i mue bövie bise'e vaejë'iroho dë vövöbajo'o uhohu'o ma-mae jioromo raromo jijihonövore. God-hu jemë hesinö jëvojöro uëvade aho hu ma-maemu jiajëhi ëhi jiore.

¹⁶ Ëhesi bëhoho God-are surire jöho uvë'eje: God na ma-maemu jevë'e jiaje ëhuni jemë'o ma-maemu jiorëjo. Ëhuni ëhi ë'onörovore.

¹⁷ God-ro bogo nue gö gö uehorovoromo gö'i a'i ma-gemu göromo nosi muoho diehi jiego garomo mae o sisë uövuajeje. Ëhi jië'e aho jemë Vavuoho hö uavarujeje. Ëhuni ave sa'are ma-jahuri raromarujoro God börömoho hö uehorovë'i raromore.

¹⁸ Ëhesi bëhoho jemesi hijo miono'ohuro Keriso bogo uehorovë'ëro bëhi rumo'e muoho röjëhibe rovamu jemëro ëhemu ejëhoromo sisë hesi darugoremu raromonövarijeje. Ëhi jëvë'ëro God-hu

nimaje muoho bogo vae varijënoho jëvadeje. Ëhi jëvamu God-ro ajëmijë'ëro mae jëve. Röhu jemë'o iae gavarujeje. God-ro jemë ajëmi'irögoro ijo bajoho o bövi bise'o maho bogo ëho bul'öromo ëhuro ajëmijadeje ëhi jië'e inömoho ma-jahuri inöme jië'ego.

¹⁹ A'i Keriso-are kö maho bamoromo ëhuro mae ajëmijadeje. Ëhesi bëhoho urimoroho Jew rajëro God-ni suvuro bamaho'ië'iroho sheep harihe ma-mahuremu muo'amoromo suvuroho bama-honövareje. Keriso ëhi jië'e suvuro maemu jiadeje. Ëhi jiamu God-ro hu bamadeje jemëni guomoröhego.

²⁰ Jemëni guomoröhego sa'ae bövie bise'e bogo bamadevare God-ro hu baejadeje. Amo ave ijo tugoho'i majare jemesi jöëni God-ro hu nugö'öjamu a nuniro rovadeje.

²¹ Rueromo jemë ajëmijë'ëro ëhu'ëro jemëro God mae uehorovarujeje. God-ro Keriso ajamamu ri'öromo aji maho baejë'ëro ëhu'ëro jemëro God gemu uehorovoromo uvarujeje: Iae huro no'o ajamui'ajëjo.

²² Röhu God-are jö maho ejahoromo ëhuro mu sisë uehorovarijoho vuonugë'e jëve. Vuonugo'irögoro Christian ö mueno'oho bogo ma-döemuoho a'i dë vövöbajo'o uhohu'o uehorovëv'e jëve. Ëhuni göëro göho dë vövöbajo'e aho'o uehorovëvo avohore

²³ ë hesi bëhoho jemë Christian vaeromo ëhuro harihu aboji'e i'e rahëvanovamu i'oro aevoromo biririvë'e jëvaje. I'o rahëvade hesi bëhoho vuovëvo'iröhe vëmu vavu'o jabesi ujoho bogo

bamëvo'i a'i God ioro'ioemu hijaje a hesi ujoho bamëvadeje. God-are ujo hesi bëhoho iae God-are jöeje. Hesi jöho darugo bojëmijaje ioro'ioemu jioröhe jöhoje.

²⁴ God-are surire jöho ëhi gemuoho uvë'eje:
Ae aho'obëhe garasi va'ëne jio'amajëjo.
Inöme bövie bise'e mabëhe hö uehorovaruoho
ëho resu resu ino va'ëne höjo.

Röhu garasioho sahori'amaje höjo.

Resu inoho rireromaje höjo.

²⁵ A'i Badare jöho ëhi jiemu jioje va'aje höjo.
Ëjöho iae Keriso-are jö ma aehu majëhijamu he-
jarijohoje.

2

Bada Iesu hu munë va'ëne jiaje jöhoje.

¹ Jemë i'e rahëvanovë'e aribövie jëvë'e jiaje ëhuni mu sisëho aho'obëhe vuonugore. Sareri sareri'e muoho döëremu mae vaejaruje muoho vuonugore. A jabesi mu mahuni dë vörönëgajoho vuonugore. Jö sisëho vuonugore.

²⁻³ A'i jemëro mami'e herovarijeje Badaro jemë huë baejëvamu. Huë baejëvamu herovë'e jëvaje ëhuni i'e rahëvë'e asisö'ehu amu rihu ue'aho'i nimoruomajëhi ëhi dë vövöbajo'o hesi amu maho ue'aho'i nimonörovore. Ëhi jië'e amu ue'ahë'oho jemesi aru'ahoho biririvobe va'ojuvo ijönö a du-
vaho va'ëne jioromo maro raromo'aruje.

⁴ Röhu jemëro Bada Iesuarinö ruere. Hu hesi darugoremu hiromo darugo bojamuijaje ahoje. Hu munë va'ëneje. Ëmunëho aëro sisë

hö uvoromo vuonugamu God-ro maego hesi baejadeje.

⁵ Röhu jemëro Iesuarë darugoho baejë'e jëvaje hesi öroro rovego God-ro jemë munë gagovëvanovoromo hu'o havëvoromo javu böröme vaejëvanovo'iro jemë gemuoro jëvego hesi Aru'ahohuro ë va'o hi'iröhe. Ëosa börömore jemë ë rumo va'oromo priest muoho vaenövo'aruje. Jew rajo priest-ehu God-are osa börömore rumo va'oromo God-ni suvuoro bahijaharëhi jemëro ëhi priest muoho vaeromo jemesi dë vövöbajo'o suvuoroho Iesu Keriso-are jöëni God-are örire bojaminövo'aruje. Ëhi jië'e suvuoro bojamijë'o ho God-ro garomo nimajeje.

⁶ Ëhesi jöho God-are surire jajivoromo uvë'eje: Ëhuro gahëjo. God naro munë va'ëne aho Zion bamajëjo huro munënö'e biriri'e bönu mabëhëro namijego ëhuro javuoho bibivoröhego. Ae rahu ë aho mae uehorovë'o ho bogo javojimo ga'a'ajëjo.

⁷ Mae uehorovaruje aribövioho jemëro uvarujeje: Ëmunëho iae mabëhe höjo. A'i bogo ma uehorovarue aribövi jabesi jöho God-are surire jajivoromo uvë'eje:

Munë javue vae'irögorö munë gemu bijönimoromo vuonugare höjo.

Vuonugarohö jaruvohö ë munëhuro javuohö nigemo'ego bibivoromo mae namijajëjo.

⁸ Röhu jabesi jö göho jajivoromo ëhi uvë'eje: Aëro ë munë va'ëne are ro biberovo'aruëjo. Hesirire ro rireromö'aruëjo.

Biberovarue hesi bēhoho God-are jōho juahobijioharueje God-ro ēhi jiē'e i'uoho bamēhē'ēro.

No God-are aribōvie javuaje jōhoje.

⁹ A'i jemē God-ro baejēvē'e aribōvie jēve. Hu'o masije riravaruje priest ōmo'ōme jēve. Ma-maemu jēvē'e aribōvie jēve. Hesiremu jēvaje hesi bēhoho jemēro hesi mu mabēhi hesi jōho ae majēhi'irarijego rabēni jemē ramoramore raromamu huhu baejēvoromo hesi aji mare bamēvadohuni ēhuni ae majēhi'irarijego.

¹⁰ Urimoho jemē iho rumo'e aribōvie jēvadeje. Jaruvoho God-are aribōvie jēve. Urimoho God-are huē maho bogo baejarijeje. Jaruvoho hesi huē maho baejē'e jēve.

No God-are muemu vaejarue aribōvie javuaje jōhoje.

¹¹ Aganomē na jōgore bojēmi'irōgoro ē'e. Jemē ave sa'are raromarujoho sa'a gōre majahuri raromarue aribōvioho va'ēne jēvanove. Ēhuni uēve jemesi sinehu mu gō gō nimoromo aru'ahohu'o umogihajoho nadi gavanovore.

¹² A'iro God bogo uehorovarue aribōviohu'o raromoromo mu maemu vaebe va'ore. Ēhi ē'l'ē'ohō jabumēro jō sisē bu'ōromō jemē sisē vaejaruje hō uēvaruoho rōhu gē'irōhe jemē mu mae vae'iramu gēgorovo va'o ēho majaho rue'iramu God-are ihoho mae ua'ē'ō.

¹³ Rōhu Badare jōho uehorovoromo aehu masijo bahi'amare aribōvioho aho'obēhe jabesi jōho ejēhore. Aehu bōrōme namiromo nosi sa'ae aho'obēhe muebejavuajoho ejahore.

14 A börömo hesi bēhire raromoromo sa'are mu muebejëvaruoho ejēhore. Ēsa'are a börömo huro jabumē rēmō'ōjë'eje mu sisē'e aribövioho i'ue bojēmi'i mu ma'e aribövioho mae uērōhego.

15 Jemēhu a masijo ejēho'irarije hesi bēhoho God hu nime jemēro mu mae vaejego sisē'i uehorovarue ariböviohuro ēho garomo simano rumo'e jōho vuonugorōhego.

16 Rōhu aehu a gö jabesi darugoremu raromoromo jabesi muemu vaejaruēhioho nadi ēhioho raromo'i mae raromo jijihore. Ēhi'ore rōhu nadi uvore: No bogo a darugoremuoho raromo'i iae no nosi mae raromo jijiharuēromo ēhuni ri'ōromo mu sisēho vaere. A'iro uvore: No God-are darugoremu raromoromo hesi muemu vaejarue aribövie javuajēromo mae raromo jijihore.

17 Ēhi'oromo ae aho'obēhe rajēhire. Christian ö mueno'oho dē vövöbajo'e aho'o uehorovēvore. God böröme hō uehorovore. Sa'are böröme namiromo muebejavuajoho rajahire.

Kerisohu huë vavaeni baejadēhi no'o ēhi huë vavaeni baerōhe jōhoje.

18 O ae gö jabesi darugoremu raromoromo mu vaejēharuje aribövioharo jemesi mu simano vaejarue aribövioho masije hō uehorovoromo jōho ejēhonövore. Jemesi a masijehu a mae jioromo sanu'e jōemu majēhijē'oho ejēho'i rōhu vörö'e aribövioho jabu'o ejēhonövore.

19 Ēhi jiē'e sisē aribövi ejēho'irarije hesi bēhoho jaehu God-are jö uehorovanuohuni aehu huë vavaeni ëma bojāmamū mā-herovē'i

taemorovoromo hijë'oho God-are huë maho bae'a'anue.

²⁰ O jemë mu sisë vaejamu aehu muo'amëvamu jemëhu ma-taemorovë'oho no rabëni uvo'ejo: Jemë taemorovarujohuro jemesi ihoho ajiomé'e höjo. A'i jemë mu mae vaejë'iro huë vavaeni bojëmamu ma-taemorovë'oho ehuro God-hu gavajoho maeje.

²¹ Rabëni hesi bëhoho God-ro ëhi jië'e huë vavaeni'e muoho jemesi örire bojëmijë'eje. Keriso hu'o jemesi jöëni huë vavaene baejadeje. Huë vavaene baeromo ehuro jemëhu diehi ë'irarije muoho röjëhijadeje huhu ë'adëhi jemë'o ëhi ë'irarijego.

²² Hu mu sisëho bogo vaejadeje. Sareri'e jöho bogo jövadeje.

²³ Aehu sivohijaroho bogo mana sivëgonövohijo. Aehu vi'ehi bojamihijaroho hu bogo jö darugo'oho mana majëhinövohijo. A'i hesi arijo'arije God-are övo döre bamorovadeje hu mae mevoromo gavaje aego.

²⁴ Ëhi'oromo huro nosi sisë hesi i'uoho hesi sino haho'ere baeromo korosire guomadeje ehuro no vuovanovoromo öri sisëho ioro'ioire gemu vuonugo'i i'ovoromo öri maremu jijihoröhego. Huhu vi'ehi baejadohuro ehuro jemë sisë'i raro-marijoho marëjëvë'eje.

²⁵ Sheep-ehu sidövanovoromo jijiharijoho jaruvoho sheep o jemesi aru'aho muebe'amaje a hesiro vuonorö'ö rovë'e jëve.

Vaboro'o baru'o diehi ë'iröhe jöhoje.

1-2 Röhu vaboroharo jemesi baru jabesi jöho ëhi ejëhore. Ejëhorego baruehu God-are jö bogo ma uehorovë'oho vaboro jemesi Christian jöho bogo hejë'e jemesi muohemu garomo ga'iro jemëro God böröme hö uehorovoromo mu ma-maemu vaejego gëromo huotorovoromo Keriso mae uehorovorouomo'iro.

3 Röhu jemë mae jëvego baruehu gëjoro nimë'oho nadi sinemuoho rajahirovoromo ijo bajo börömoho bu'öromo ëhuro simano uoho avohorovoromo nieniaho niögoho bövioho bise'oho imoromo io'amego mae jëvego gë'iro.

4 Nadi sinemuoho uehorovo'i a'i dë vövöbajo'o uhohu'o avohorovego gë'iro jemesi muoho mae jiego. Sino avohorovë'oho mavojirojëvo'iramu sisërëjëvo'ë'e. O dë vövöbajo'o avohorovë'oho gë'lë'ö mae jëvemu jëvobe va'iramu. Dë vövöbajo'o avohorovo'irarije hesi bëhoho ma-u'emu taemo raromo'irarije jöhoje. Jemë ma-u'emu taemo raromë'oho God-ro gëvajeje jemë ma-mabëhe jëvego.

5 Urimore God gemu uehorovonövare magonaho ömo'ömehu jabesi dë vövöbajo'o avohorovarëhi jemë'o ëhi avohorovore. Jabu ëhi ma-u'emu taemo raromoromo avohorovoromo jabesi baruoho ejëhonövareje.

6 Ëhi jië'e magonahe gemu Sarah-ro hesi barue Abraham-are jöho ëhi ejahoromo hesi örire uanövadeje: Nasi böviohajo. Jemë bogo nu-runurumoromo juhuonivo'i a'i mu mae vaemu vaejë'oho ëhuro jemë Sarah-are aboji ömo'ömoho va'ëne jëvanovo'ë'e.

⁷ Röhu baruoharo jemesi vaborohu'o gemuore raromarujevaro ëhi avo'avoho uehorovoromo raromore. Uvore: Ama'i nosirire jiaje darugoho ëhi jië'e darugoho magonaho jabesiroho bogohöjo röhu jabu'o no'o God-are harihu aboji'ëro javuë'ëro huro no ajamui'iramu ioro'ioremu hu'o maro raromo'ëjarëromo vaboroho rajëhire. Vaboro rajëhijë'oho ëhuro jemëhu God-are örire jö ataruje muoho bogo sisërë'ë'e.

Noehu mü ma vaejego aehu bijönimoromo huë vavaeni bojamuijarue jöhoje.

⁸ Röhu jöe gemu ijo tugoho'ioho majëhi'iramu iae barë'ë'e. Jemë ae aho'obëhe jöe gemu uehore gemu baeromo ö mueno'ehu rajahirovaruëhi ëhi huë baeromo rajahirovoromo ma-taemo raromore.

⁹ O ae göehu sisë vaejëvë'iroho nadi mana jabesi öriroho sisë vaejëvore. O jö sisë uëvë'iroho nadi mana jabesi öriroho jö sisëho uë'i a'i jemëro God uavego huro jabumë mae vaejëvo'iro. Ehesi bëhoho God-ro jemë hesinö jëvojöro uëvadeje ëhuro jemë mae vaejëvego maro raromo'irarijego. E'huni jemëro hu uavego a ioro'iorohu'o mae vaejëvo'iro.

¹⁰ Jemëhu ëhi ömo'irarijoho God-are surire uvë'eje:

Ae rahu mae hi'ie'iroho
sine sasohoromo juvo'ie'iroho
bitare taemoromo jö sisëho nadi bu'önëjo.
Jö'e tugohoromo nadi jöho ruëroho numëroho
ma-jövonëjo.

11 Mu sisë vaejanuoho gororomo mu maemu vaenëjo.

A'lo mae avoho hi'i sivoho avohonëjo

12 rabëni hesi bëhoho Badare nunoho ma aribövi jabesiroho bogo ahoro'i

ëninamijaruoho hejëho'i

sisë aribövioho deje bojëmaje jiaje.

13 Jemë mu mae vae'i ëhemu uehorovë'oho rahuro jemesi öriroho sisë vaejëvo'ë'e. Aho bogo sisë vaejëvo'ë'ö.

14 Röhu jemëhu mu mae vaejamu aehu bijönimoromo huë sisë bojëmamü baejë'ohuro ëhuro jemë maroho jëvo'ë'e. Nadi aho juhuonëmiromo nurunurumo'i

15 dë vövöbajo'ö uhorö uvore: Keriso börömëro jië'ëro Bada hö uvoromo hu gemu mae uehorovore. Hu gemu mae uehorovoromo he'irarije God-are jö bogo heruomë'e ariböviehu jemë uëvamu: Mu maehu rueröhego uehorovaruje hesi bëhoho majahuihego hejarë uëvamu hejë'oho simane sasohoromo bëhoho röjëhire.

16 Röhu ma-u'emu sanu'e jöhemu röjëhiromo mu maemu vaerego ëhuro jemesi dë vövöbajo'oho marëjëvo'i ëhuro jemëhu Keriso-are ijore ijore jijihoromo mu mae vaejarujoho ëho aehu sivëgë'oho jaburo jemesi muoho garomo javoje bae'iröhe.

17 Mu sisë vaeromo vi'ehi baejë'oho sisë jio'i a'i mu ma vaeromo God-hu nimamu vi'ehi baejë'oho ëho iae maeje.

18 Keriso hu'ö a maëro jië'ëro sisë'e ariböviohuni uehorovoromo ma-gemu

guomadohuro ehuro jemesi sisëho ma-ioro'ioremu mu'uvëhadeje ehuro jemë God-are örire söjëvo va'oröhëni. Hesi sino haho'oho guomo'i röhu hesi aru'ahoho i'ovadeje.

¹⁹ Hesi aru'ahohuro i'ovoromo va'o aru'aho ioro'iorehu savoji gago va'ënire sisë'i raro-maruire ë va'oromo jöho majëhijamu heruomadeje.

²⁰ Röhu ë hesi urimo Noah-hu hijadevaroho evaroho ë aribövioho bogo vuovë'e sa'are raro-mareje. Sa'are raromoromo God-are jöho bogo ejahonövareje. Jöho bogo ejaho'ego Noah-ro boat börömoho vae'ego God-ro ëhi ma-hiromo muebejëvonövadeje ë ariböviohuro avoho uehorovoruumojöro. Muebejëvamu jöho bogo ejahareje. Bogo ejhamu ae ma-vemino'e ae aho'obëhe 8 boat-re rumo va'amu jovo döre jëvoromo ehuro mae jëvadeje.

²¹ Ejëvehu uhu'e ë'adoho jovehu bapataeto vaejaruëhi ëhi jianove. Ehesi bëhoho jemë bapataeto vaejë'oho sisë'i raromego God-ro jemë baejëvoromo maro rëmego mae jëvajeje. Bapataeto hesi bëhoho bogo sinore jiaje va'inumoho dibojöro bogo ehunioho jovoho eguo'i a'i bapataeto hesi bëhoho bapataeto vaeromo jemë God uavarujeje: Nosi dë vövöbajo'oho avohahuego no uvo'irarëjo: Nosi sisëho iae u'ovahuë'e höjo. Röhu bapataeto vaeromo jemë bogo sisëroho va'i mae raromarujeje rabëni Iesu Kerisoro guomoromo ri'öjë'ëro ëhu'ëro.

²² Iae Iesu Kerisoro ri'önugoromo ö'idöre ajiomë'ëro God-are övo manö böröme namiromo

anera'lo ö'idöre raromoromo darugo baejë'e aru'aho ioro'iorohu'o jabesi örire huro jöho bojëmego hu gemu ejahoruomajeje.

4

Sinehu nimaje mu vaejaruoho vuonugo'i God-hu nimaje mu vaeröhe jöhoje.

¹ Kerisoro hesi sino haho'ere vi'ehe baejadeje. Vi'ehi baeromo mae uehorovadëhi jemë'lo ëhi gemuoho uehorovoromo ëhuro avoho biririvore. Ae rahu jabesi sino bogo uehorovo'i Kerisore jöeni vi'ehi jabesi sino haho'ere baejë'oho ëhi jië'e aribövioho mu sisëmu vae'i nimaroho vuonugë'ejö

² ëhuro sa'are raromo'iröhe maja vituroho sinehu nimajohemuoho bogo uehorovo'i a'i God-hu nimajohemu uehorovë'e raromo'iröhëro.

³ God-are jö bogo heruomaje ariböviehu ömo'i nimoruomajëhi jemëhu urimo ëhi ömonövarijoho iae eni jië'eje. Urimoho jemëro öëro ë'anovoromo dëre ri'öjëvego bövie bise'e ëma ömonövarijeje. Jovo sisë iromo simane sisërënövarijeje. Mahëro gemuoro uruvanovo'amonövarijeje. Söröro raromanovoromo vörö'e jovemu ue'ahonövarijeje. Uehore sisë'i baeromo uvonövarijeje: Inöme gö gö aru'aho'e höromo uvene aho röjëhinövarijeje.

⁴ O jaruvoho jemë God rumo'e ariböviohu'oho bogo gemuoroho sisëho vaeromo bövioho bise'oho ëma ë'oromo ruëroho numëroho ëma jijiharujeje. Jemë bogo ëhioho ë'ego gëromo ë ariböviohuro uvarueje: Noehu ë'aruëhioho

jabumë rabëni bogo ëhioho ë'arue hõromo tiõjarueje. Tiõromo jemesi ihoho ijumëharueje.

⁵ Ijumëharuoho ijonõ mu sisë rabe rabe ë'aruoho God-are õrire huruoho majëhi'ë'õ huro ave sa'are raromarue ariböviohu'õ mami'e vuovade ariböviohu'õ mevavuo gö'irõhëro muebejavuoromo hijajego.

⁶ Ëhuni vuovë'e aribövi jabesi õrire Keriso-are jö majëhijamu hejare hesi bëhoho ëhuro ma-aeu sisë hesi mana nosi sino haho'ere baeromo vuovaruëhi jahu'õ ëhi sisë hesi mana sino haho'ere baeromo vuovëvadoho God-hu biririvoromo hijajëhi jabesi aru'ahoho ëhi mae raromorõhego.

Mu vaerõhe suvuoro God-hu bojamuijajoho avoho mueberõhe jõhoje.

⁷ Bövi bise'õ barë'irõhe majaho dunove. Ëhuni taemorovoromo avoho mueberovë'i parie vaenõvore.

⁸ Röhu aveho bõrõmoho jiaje ëhuremu uehorovore. Göëro göho dë vövõbajo'e aho'õ uehorovo avohore rabëni huë baerovaruohuro mu sisë aho'õ mu'uvahuaje jiaje.

⁹ Röhu ga'irarije Christian õ mueno'e vejõ'e i'e rovamu gavë'iroho uëre: Nosi osaro ro raromõhëre. Nadi i'uhõ'i dë vövõbajo'e sasohoromo ëhi jië'e muoho vaere.

¹⁰ Röhu God-ro hesi nimoromo suvuore gö gö ae gö gö bojamuike va'aje jiaje ëhuni God-hu diehi jië'e suvuoro bojëmamu bæjarijoho avoho muebejahoromo ë suvuorohuro göëro göho ajamirovore.

11 Jö majëhi'irarije suvuoro baeromo God-are aribövi majëhi'ie'iroho God-are jöhemu majëhire. A ajëmi'ie'iroho God-hu bojëmaje darugoho baeromo ë muoho vaere. Mue bövie bise'e avo'avoho vaejogo aëro gëromu uvo'iro: Jemë Iesu Keriso-are ariböviëro jëvë'ëro ë'arujë uvoromo God-are ihoho dö maro bamoruomo'iro. Aji maho darugo maho hesiremu ioro'ioemu jiemu jiohe va'ë'e. Iae mae.

Keriso'o bimuvoromo huë vavaeni baeröhe jöhoje.

12 Aganomë huë vavaenoho jovëro ruomanovajeje God-ro gëröhego jemë biririvego o bogo. Huë vavaeni baejarujoho nadi uvore: Diehi'ego ë'ajëromu tiö'i

13 ma-uvore: Kerisohu huë vavaeni baejadëhi no'o ëhi gemuoho baejaruëromu nimorohore. Ëhi jië'oho ijonö Kerisoro hesi ajoho röjëhi'iramu garomo jemë nimoroho avoho'aruje.

14 Aehu Keriso-are jöëni jemë sivëgë'oho huë mae jëvajeje rabëni God-are aji'e Aru'ahohuro jemë aegëhë'ëro.

15 Röhu jemëhu a anamu guomë'oho o vajiohehu baejë'oho o mu sisë gö gö vaejë'oho o ae gö jabesi mu ëma ahobe jijihë'oho ëho sisëje. Nadi ëhi jië'e muoho vaeromo ëhuro huë vavaenoho mana baere.

16 O Christian jëvamu aehu bijönëgoromu huë vavaeni bojëmamumu baejë'oho nadi javojoho bae'i Keriso-are ihoho baejë'e jëvaje ëhuni God-are öröro huë mae uare.

17 Noehu vi'ehi baejarue hesi bēhoho God-hu mevavuo'irōhe majaho mami'e aevē'eje. Iae hesi aribövire bēhe vaeromo mevavue. No rabe gavaruoho ma-i'e aevajoho röhu va'ojuvo ijonōho God-are jō ma bijönimarue aribövioho diehi jēvo'ē'e.

18 God-are surire jōho ēhi gemuoho jajivoromo uvē'eje:

Mu mae vaejarue aribövioho bogo ěma maroho va'i huē vavaenēro anojamuijuvo ě hesi ijonō evare maroho va'o hesi javuajējo. Ĕhuni God deĵo bojamiromo mu sisēmu vaejarue aribövioho diehi jēvo'ajējo.

19 Ĕhuni God-hu nimajēhi huē vavaeni baejē'oho uvore: No ave sa'are bamavuade ahuro ajamui'i uvadēhi ēhi ajamuijajēromo mu mae vaeromo jemesi arijo'arije hesi övo döro bamorovore.

5

A duvahehu God-are ö mahu'o avoho muebe'amo'irōhe jōhoje.

1 O God-are ekaresia muebejēvaruje a duvahoharo nasi jōgoru harihoho gare. Na'o ekaresia muebejēvaje a duvahe jeve. Naro gavodeje Kerisoro huē vavaene baejamu. Röhu u'emu Kerisohu hesi aĵi ma röjahuijē'iroho huro nasi örire bojemi'iramu na'o hu'o gemu mae ajoho bae'ejo. Na ēhi jĵie'e aēro jevē'ēro ěhuni ave jōho majēhi'iē'e.

2 God-ro hesi sheep-oho bojēmijadeje jemēro muebejaho'irarijego. Ĕhuni jemēhu hesi sheep muebejēvē'iroho nadi ě muoho bijönimē'i

muebejëvo'i a'i God-hu nimajëhi ëhi muoho nimoromo hesi sheep-oho muebejëvore. Nadi moniemuoho uehorovoromo muebejëvo'i a'i muoho dë vövöbajo'e aho'o nimo avohoromo God-are aribövioho muebejëvore.

³ God-hu jemesi övore bamëvade aribövioho nadi masije jëvajë uvoromo i'ue gö gö bojëmi'i a'i mu mae vaeromo öroho röjëhirego jaburo gëromomo ëhi ë'irovo. Ëhi muebejëvore.

⁴ Ëhi ë'ë'oho Sheep Muebejavuaje A Börömehu rovë'iroho ioro'ioremu jioröhe aji'e suvuoroho bae'a'aruje.

⁵ O a i'oharo a duvaho jabesi jöho ejëhore. Röhu ekaresiae aho'obëhe jemëro ma-u'emu taemorovoromo huë baerovoromo ajamirovore. God-are surire jöho ëhi gemuoho uvë'eje:

Biriri'övoromo masije javuajë uvarue aribövioho
God-ro ahëvaje höjo.

Ma-u'emu taemo raromarue aribövioho God-ro
hesi nimoromo huë baejëvoromo ajëmaje
höjo.

⁶ Ëhuni uvarujoho: No masije javuajë uvarujoho vuonugo'i uvore: God-ro gemuëro darugo'ëro jië'ëro böröme namiromomo no muebejavuaje höjo. Ëhi uvë'oho majae eni jio'iramu huro ajëmi'iramu jemesi ihoho döro ajiomol'ë'e.

⁷ Röhu nurunuruëgajoho aho'o God-are öroro bojamire hu jemesi jöëni uehorovaje jiaje.

⁸ Röhu nune jioromomo gavë'i raromoro. Satan hu jemë'o muorovaje aeje. Vörö'e miehu darugo'o uvobe mi ja'ihol'i nahobe juvajëhi Satan-ro jemesi örire ëhi ë'ajeje.

⁹ Satan-hu ëhi ë'ë'oho biririvoromo God mae uehorovoromo ëhuro ahore. Ahoromo uvore: Nosi Christian ö mueno'e aho'obëhe sa'ae dinö'e dinö'e raromoruomajoho ëhi jië'e huë vaenoho baeruomaje höre.

¹⁰ Jemë majae ma-bisemu huë vavaene baebe va'oromo majae ijonö God-ro ajëmiromo jemesi dë vövöbajo'oho avohëhoromo daruge bojëmi'iramu ëhuro ma-mae jioromo munënö'e biririvoromo riravo'aruje. God-ro huë baejavuoromo bövie bise'e ajamuajeje. Huro uëvadeje jemëro Keriso'lo gemu mae jioromo hesirire ioro'ioremu jiaje ajoho bae'irarijego. Ëhuni iae ajëmi'ë'e mae jëvoröhego.

¹¹ Hesi daruge jiajoho ëhi gemuoho jiemu jiobe va'ë'e. Iae mae.

Peter-hu ijo tugoho'i jajivoromo jejëmijade jöhoje.

¹² Silas-ro na ajemiromo ave surire jö har-ihoho jajivë'e javue. Na uehorovoromo uva-jeje: Hu Christian ö mae höjo. Röhu na jajivode hesi bëhoho jemëro adahego dë vövöbajo'e mae jëvoröhego. O göho naro gavë'ëro ëhuro majëhiromo uë'irodëni: God-are huë ma'e öroho ëhi höjo. Ëöroho bogo sareri'ehu jio'i iae mae höjo. Biririvoromo ë örohuremu jijihorëjo. Ëjöho majëhi'i negamu ave suroho jajivë'e jeve.

¹³ Babylon amore raromarue ekaresiahuro jemesi örire jejëmijareje God-ro jemë'o jabumë'o baejëvamu hesi aribövie jëvë'ëgo. O nasi Christian harihe Mark-ro jemë jejëmijadeje.

¹⁴ Keriso-are aganehu rajahirovaruëhi ëhi je-
jamirovore.

Keriso-are aribövie aho'obëhe jemëro God-are
huë maho baeromo raromore. Ahia mino'e.

God-are Jögoru I'oho
The New Testament in the Omie language of Papua
New Guinea
Nupela Testamen long tokples Omie long Niugini

copyright © 1991 Wycliffe Bible Translators, Inc.

Language: Ömie (Omie)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 18 Apr 2025 from source files dated 31 Aug 2023

a68769b4-6180-5825-a17e-676d8f6a7efa